



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

19. Kalenderwoche – ab 10. Mai 2009

Andraach an de AOK

Isch hab ja gahr nisch gewussd, dasses sowas gähm dud - een Weldlachdaach! Ja, es dud een Weldlachdaach gähm - das had in dor Zeidung geschdandn... vorsche Woche! Een Daach zum Lachn! Fiehr de Lachsägge!

Nähmbei däde misch indressiern, obs ooch een Weldheuldaach gähm dud. Fiehr de Heulsußn!

Een Drauordaach gibbds - dähn Volgsdrauordaach, abor dähr is ehm bloß fiehrs Volg un nisch fiehr de ganze Weld. Un Drauorn dud ja ooch ohne heuln gehn. Abor das ma jedzde bloß so dahingeschdelld. Nee, mir duds um dähn Lachdaach gehn.

Da haddn se nähmlisch in dor Zeidung ooch geschriehm, wie gesund das is, wemmor viel Lachn dud. Das Lachn däde dann de Ardehrijen endschbannen un dähn Greisloof off Duhrn bring... un dann wern noch irschendwelsche Schdoffe ausgeschidded, die de bosediefe Schdimmung hehm dud. So eene Ard von Gliggsschdoffe! Wie se ooch in dor Bannahne drinne sinn.

Un ibor dreihunnord Musgln solln jedsma, wemmor lachn dud, in Beweschung komm!

Isch hab gahr nisch gewussd, dass dor Mänsch soviele Musgln hamm dud! Dreihunnord! Wo die alle schdeggn solln? Odor dud mor offs Aldor hin, e baar Musgln vorliern? Abor egahl - jednfalls is Lachn noch viel bessor, als wie Schoggn odor Fahrradfahrn! Eenfach ma bißl Lachn! Dreihunnord Musgln wern beweeschd! Inglussiefe Zwerschfell!

Das Brohblehm is nu wahrscheinlich ehmsd bloß, dass de was brauchn dusd, wodriebor du lachn

kannst. Un mansch eenor had ehm so guhd wie gahr nischd zum Lachn im Lähm. Isch will ma jedzde nisch anfang rumzujammorn, was mei eischnes Lähm im Zusammenhang mid mir un meinor Gudstn bedreffn dud... - nee, isch habb da ooch nisch grade viel zum Lachn.

Guhd, wenn de dir anguggn dusd, was im Radhaus von Gemndiz so loofn dud... odor ooch beim Wahlgambf off Landes- un Bundesähbene... guhd, das is schon manschma sähr zum Lachn... odor ooch wenn jedzde de Bresse un das Fernsähn nahdlos un geschlossn von dor Finanzgriese off de Schweinegribbe umschwenkn dun... - nee, da hasde werglisch e Haufn Ansatzbunkde fiehr een ausgiebischn Lachanfall, aber es is ehm alles nisch direggd lusdisch!

Ja, scheenor is nähmlisch, wensde ibor was lachn kannst, was ooch lusdisch is. Odor widzisch! Nisch bloß lachhafd!

Un hier is nu dor Bunkd, wo isch eischendlich bei dor AOK dähn Andraach schdelln meschde, dass isch in de Lisd e offgenomm wer, wo die Behandlungen un Dherabijen schdehn dun, die de AOK bezahld. Wenn das Lachn ibor was Lusdisches so gesund is, da missde doch jedor, dähr in dor AOK is, brofilagdisch eene Freikarde fiehr de Gabaredd-Kisde krischn! Wenn das so gesund is!?

Isch meene, de AOK dud sisich ja ooch Gesundheitskasse nenn! Ja, de Ärzde missdn das vorschreim derfn - een Besuch bei...

Eduard Sachsenmeyer